

四庫全書

經部

欽定四庫全書

欽定春秋傳說彙纂卷八

乙莊王十八年齊襄十二年晉緡十九年衛惠十四年
蔡哀九年鄭厲十五年子儀八年曹莊

未一年十六年陳宣七年杞靖十八年宋
閔六年秦武十二年楚文四年

春王正月師次于郎以俟陳人蔡人

公羊次不言俟此其言
俟何託不得已也

穀梁次止也
俟待也

胡傳用大衆曰師次止也伐而次者有整兵慎戰之
意其次善之也遂伐楚次于陘是也救而次者

有緩師畏敵之意其次譏之也次于匡于聶北于雍榆是也俟而次者有無名妄動之意次于郎以俟陳人蔡人是也何俟乎陳蔡或曰陳蔡將過我俟而邀之也或曰魯將與陳蔡有事於鄰國而陳蔡不至故次于郎以待之也若是皆非義矣其曰次曰以俟者深貶之也

集說

杜氏預曰期共伐邾陳蔡不至故駐師于郎以待之孔氏穎達曰唯言以俟陳蔡不知何故

待之下有師及齊師圍邾或與陳蔡同計故云期共伐邾陳蔡不至故待之賈逵及說穀梁者皆云陳蔡欲伐魯故待之陳蔡於魯竟絕路遙春秋以來未嘗構怨何因輒伐魯也又俟者相須同行之辭非防寇拒敵之稱若是畏其來伐當謂之禦不得稱俟故知期共伐邾耳何休服虔亦言欲共伐邾趙氏匡曰師駐曰次惡興師也無寇而次是欲自為寇也陸氏淳曰非奉王霸之命以討罪救亂則不當興師惡

其興師無名故書次孫氏覺曰郕與魯為同姓之國莊公無親親之恩率諸侯以伐之春秋于郎以侯陳蔡我侯之也及齊師以圍之我約之也其為志者皆我也所以見內之罪也陳氏傅良曰此吾君將也何以稱師莊之會齊皆譏也莫甚於及圍郕是故一貶之師行不言次必久而無功也而後言次吾師嘗久外矣而莊公特書次以莊之不競於齊也侯陳蔡不至及齊圍郕郕降于齊師以正月治兵及秋而還斯可以言次矣張氏洽曰不由王命妄興師衆久次於外無名而動期會莫應故書師次又書侯以深責之李氏廉曰春秋書內外之次十二胡氏分三例伐而次善之也救而次貶之也次而侯無名之師也莊三年公次滑三十年師次成皆可入伐而次之例襄元年仲孫蔑會四國次鄆可入伐而次之例莊十年齊宋次郎可入無名之例又有次而伐者亦貶之楚蔡次厥貉齊衛次五氏垂葭蘧蔆也汪氏

克寬曰十二公惟莊公書次者三昭公書次者三莊公忘親釋怨欲救紀與鄆而不能俟陳蔡不至而遂及齊圍郕昭公失國而祈哀乞憐於齊晉卒至客死皆惡之大者故書以示戒是以他公之次皆不書馮氏若水曰春秋無義戰敵加於已不得已而應之人來會已不得已而會之猶可言也至於先出而俟之罪在我矣不可言也

甲午治兵

治公作祠

公羊

祠兵者何出曰祠兵入曰振旅其禮一也皆習戰也何言乎祠兵為久也曷為為久吾將以甲

午之日然後祠兵於是

穀梁

出曰治兵習戰也入曰振旅習戰也治兵而陳蔡不至矣兵事以嚴終故曰善陳者不戰此之

謂也善為國者不師善師者不陳善陳者不戰善戰者不死善死者不亡

胡傳

此治兵于郎也俟而不至暴師露衆役久不用則有失伍離次逃亡潰散之虞故復申明軍法

以整齊之其志非善之也譏黷武也

集說

劉氏敞曰治兵者何習戰也常事不書此何以書譏何譏爾春而治兵不時也治兵以俟陳蔡

也何以不言地國中則不言地何以不言公國中則不言公又曰左氏曰治兵於廟禮也非也凡出曰治兵入曰振旅是以秋治兵春振旅今魯以春治兵治兵非其時何以為禮乎且若中禮是則常事耳亦何足書乎又言於廟夫廟中嚴矣非治兵之地也張氏洽曰久次於外而所俟者不至衆心不一故申明約束以訓齊其衆而不知出不以律已失治兵之本矣雖欲治之其將能乎書曰治兵治者不治者也

程氏端學曰有文事者必有武備故治兵於閒暇之時而用之於不得已之際則師出以律矣今莊公輕次於外俟陳蔡而不應衆心離貳然後治之末矣李氏廉曰周禮中春教振旅遂以蒐中夏教茆舍遂以蒐中秋教治兵遂以獮中冬教大閱遂以狩然春秋有書治兵大閱者其只講武而不及於獮狩乎有書蒐書狩者其兼及於振旅大閱乎穀梁治兵之義甚善但注者以為予莊公能以嚴終則失之矣汪氏克寬曰周禮大司馬因秋獮治兵以教戰公穀皆言出而治兵今莊公不以仲秋田狩而教戰又不治兵於出兵之時而治兵於次郎之後皆非禮也蓋莊公之治兵非預備不虞之意實久役不得已而治之爾大閱治兵皆一經之特筆而桓公有所畏而大閱非其時莊公有所俟而治兵非其地故皆特書以示貶不然常事不書

夏師及齊師圍邾邾降于齊師

邾公作成降戶江反

左傳

仲慶父請伐齊師公曰不可我實不德齊師何罪罪我之由夏書曰皋陶邁種德德乃降姑務

修德以待時乎

胡傳

書及齊師者親仇讎也圍邾者伐同姓也邾降于齊師者見伐國無義而不能服也於是莊公

之惡著矣

集說

范氏甯曰邾同姓之國而與齊伐之是用師之過也劉氏敞曰邾者何國也降者何降之者

何降者未失其國家者也降之者失其國家者也未失其國家者復見失其國家者不復見猶遷也又曰公羊以為成者盛也諱滅同姓也不言降吾師辟之也非也實共圍盛改謂之成實滅其國改謂之降實

降於魯又獨言齊皆非聖人之文也凡聖人諱國惡亦在可諱之域不在不可諱之域如改白為黑曰已為人豈獨非道亦不可傳世矣又曰穀梁曰不使齊師加威於郕故使若齊無武功而郕自降審如此春秋為縱失齊師之惡也其意雖欲貶齊存郕其實乃為齊文過張氏洽曰書及內之志也魯與郕皆文王之昭蓋同姓兄弟之當親者莊公忘親而志於取郕始俟陳蔡而陳蔡不來然後要齊以圍之所以郕不服魯而降于齊春秋直書以見其從讎而貪利資人以虐小二國同役而不同心敵遂得以間之魯師之出大無功也故略公而書師以著其輕用民力之罪吳氏澂曰說者謂魯欲取郕而結陳蔡同伐陳蔡不至乃藉力於齊案魯弱於齊齊豈肯為魯役魯亦何敢役之哉蓋齊欲圍郕而徵兵於魯與陳蔡爾郕畏齊而不畏魯故齊魯同圍而郕獨降齊也李氏廉曰春秋書圍國二十五始於此而終於宋人之

圍曹 湛氏若水曰莊公舍復讎之義而反同之以伐邾宜邾人之不服而降齊也

秋師還

還音旋後同

穀梁

還者事未畢也遜也

胡傳

書師還譏役久也案左氏仲慶父請伐齊師莊公不可是國君上將親與圍邾之役也然其次

其及其還皆不稱公者重衆也春秋正例君將不稱帥師則以君為重今此不稱公又以為重衆何也輕舉大衆妄動久役俟陳蔡而陳蔡不至圍邾而邾不服歷三時而後還則無名黷武非義害人未有如此之甚也至是師為重矣義繫於師故不書公以著勞民毒衆之罪為後戒也春秋王道輕重之權衡此類是矣

集說

趙氏匡云左氏云君子是以善魯莊公勞師會
讎何善之有且齊強魯弱自當不敢爭也孫

氏復曰春秋用師多矣未有言師還此言師還者惡
其與強讎覆同姓踰時還也劉氏敞曰公羊曰病

之也曰師病矣非師之罪也然則理實貶之何言善
之乎崔氏子方曰歷三時而師還春秋所以始終

其事而見其惡劉氏絢曰春秋之世用師多矣未
有所書如此之詳者何則莊公此師尤為非義上既

不用天王之命無故而興師自正月次于郎以俟陳
蔡而陳蔡不至可謂無名矣甲午治兵可謂黷武矣

夏師及齊師圍郕郕又降于齊可謂無義矣歷三時
而師還可謂害民矣夫逆天道親仇讎圍同姓勦民

力與國不信伐國不服故聖人備書之王氏沿曰
公圍郕而始末稱師者刺之也薛氏季宣曰師還

何幸之也何幸乎師之還公欲取郕而力不足藉力
於齊而齊取之以夏降郕及秋而反公謀擊齊而遂

不果故遲遲也莊公忘國之大恥滅同姓親讎敵暴師之久書之危辭也陳氏傳良曰師還不書書還危不得還也趙氏鵬飛曰書還不書至蓋無功而返何辭而告廟也或者以還為善詞夫出師無名三時而反猶曰善之春秋之法不如是之疎也李氏廉曰春秋書還例四歸父還自晉公還自晉士句侵齊聞喪乃還皆善詞也獨此年師還則異乎是氏克寬曰莊公之伐衛納朔與僖公之侵蔡伐鄭圍新城成公之如京師伐秦定公之會召陵侵楚皆歷三時而始返皆不書師還考其時而久役黷武之罪自見獨此年無名興戎師出無功春秋沒公不書以深貶之苟不書師還則不見其久役大衆之惡故備書始末結正莊公之罪也邵氏寶曰君將不稱帥師正也三稱師而不及君變乎正矣

冬十有一月癸未齊無知弑其君諸兒

左傳

齊侯使連稱管至父戍葵丘瓜時而往曰及瓜

而代期戍公問不至請代弗許故謀作亂僖公
之母弟曰夷仲年生公孫無知有寵於僖公衣服禮
秩如適襄公絀之二人因之以作亂連稱有從妹在
公宮無寵使問公曰捷吾以女為夫人冬十一月齊
侯游於姑楚遂田於貝丘見大豕從者曰公子彭生
也公怒曰彭生敢見射之豕人立而啼公懼隊於車
傷足喪屨屨反誅屨於徒人費弗得鞭之見血走出遇
賊於門劫而束之費曰我奚御哉袒而示之背信之
費請先入伏公而出鬪死於門中石之紛如死於階
下遂入殺孟陽於牀曰非君也不類見公之足於戶
下遂弑之而立無知初襄公立無常鮑叔牙曰君使
民慢亂將作矣奉公子小白出奔莒亂作管夷
吾召忽奉公子糾來奔初公孫無知虐於雍廩
葵丘杜注齊地臨淄縣西有地名葵丘後漢志西
安縣有蘧丘亭亦名渠丘即古葵丘也今山東青

州府臨淄縣西三十里有西安故城葵丘在其處
姑棼杜注齊地即薄姑也今青州府博興縣東

北十五里有薄姑城貝丘杜注齊地樂安博昌
縣南有地名貝丘今青州府博興縣南有貝中聚

胡傳

案左氏齊侯游於姑棼遂田於貝丘徒人費遇
賊於門先入伏公出而鬪死石之紛如死於階

下是能死節者也春秋重死節之臣而法有特書其
不見於經何也如費等所謂便嬖私暱之臣逢君之
惡田獵畢弋而不修民事使百姓苦之者也與大臣
孔父仇牧義形於色不畏強禦以身死其職則異矣
當是時管仲隰朋鮑叔皆沈於下僚不見庸也而徒
人費石之紛如乃得居左右襄公之所疎遠親信者
如此故以齊國之強大一也桓公用之則九合諸侯
不以兵車由親賢人遠小人所以興也襄公用之不
能保其身死於戶下由親小人遠賢人所以亡也此
二人雖死於難與自經於溝瀆而莫之知者猶不逮

焉乃致亂之臣死
不償責又何取乎

集說

劉氏敬曰穀梁曰大夫弑君以國氏者嫌也弑而代之也非也宋萬豈亦弑而代之者乎公子

商人豈非弑而代之者乎陳氏傅良曰此公孫無知也其曰無知何隱桓莊之春秋凡賊皆名之弑君者連稱管至父則其專罪無知何君弑而無知受之則賊不在二子矣春秋誅利心是故連稱管至父實弑齊襄無知與聞故者也而無知受之則無知為逆首公子棄疾實弑楚靈比與聞故者也而比受之則比為逆首張氏洽曰無知公孫也不書氏與鞏州吁同例舉於此後皆稱氏從同也又曰齊襄之見弑以禍本言之則無知之亂嫡積漸於僖公之時而襄公之惡積不可掩如抗王伐衛殺魯桓公色荒禽荒暱比小人以至禍發蕭牆身殲賊手考其即位至今所書齊事無非亡國戕身之媒所謂積不善之餘

殃也 家氏鉉翁曰齊襄淫亂不道今而見弑亦天討也春秋為之從州吁弑之例削無知族以正其弑君之罪何哉曰無知弑君自立志在乎篡罪在不赦故從州吁之例去其族而以賊討之 汪氏克寬曰徒人費石之紛如孟陽死於襄公之弑賈舉州綽郕師公孫敖封具鐸父襄伊倮堙祝佗父申蒯死於莊公之弑皆不得以死節書蓋近暱嬖幸之臣從君於昏而任其禍未可以死節許之也又曰文定謂州吁不氏責衛莊不待以公子之道無知不氏責齊僖不待以公孫之道斯亦一義然督萬亦以國氏蓋隱桓莊之春秋凡賊皆名之大義既明於初其後皆以氏稱張氏之言乃程子之意也

案無知不稱公孫絕其屬籍也胡傳罪僖公恐非篤論故刪之

丙莊王十
申二年 九年

齊桓公小白元年晉緡二十年衛惠十五年蔡哀十年鄭厲十六年子儀九年

曹莊十七年陳宣八年杞靖十九年
宋閔七年泰武十三年楚文五年

春齊人殺無知

左傳

九年春雍廩殺無知

胡傳

殺無知者雍廩也而曰齊人者討賊之辭也弑君之賊人人之所惡夫人之所得討故稱人人

者衆辭也無知不稱君已不能君齊人亦莫之君也

集說

孫氏復曰案隱四年衛人殺州吁于濮此不地者齊人即於國內殺之也稱人以殺討賊辭

劉氏敞曰傳曰雍廩殺之雍廩殺之則其稱人以殺之何討賊之辭也又曰穀梁曰無知之挈失嫌也稱人以殺大夫殺有罪也非也無知弑君以代其位不可復氏公子又上有齊人下有無知明無知者齊人

之賊亦不煩再氏國爾非謂失嫌故挈之也無知又
非大夫而以大夫例解之似仍失指陳氏傳良曰
無知嘗踰年則其曰齊人殺無知何是不成君之辭
也向也州吁之弑衛人為之變不踰年卒討之今也
無知之弑齊人亦為之變踰年卒討之是故無知不
成君而雍廩得書人是國有臣子也張氏洽曰稱
人者弑君之賊人無貴賤皆得殺之所以尊君父廣
忠孝而誅惡逆也吳氏仲迂曰聖人以討賊寄之
人人亂臣賊子無容足之地矣汪氏克寬曰春秋
之例稱人以殺而但名之則討有罪也稱人以殺而
不去其官則非討賊也經書殺弑賊者十州吁無知
陳佗夏徵舒晉里克衛甯喜齊商人楚虔公子比蔡
般是也州吁無知國人能自討賊陳佗徵舒待蔡人
楚人討之無臣子矣然皆以討賊書之也晉惠因里
克弑君而得國衛獻因甯喜弑君而復國利其所為
使復為大夫既又忌而殺之非討賊也故以國殺大

夫為文楚棄疾誘比以為君之利而俾當弑君之名
既而殺之意在代其位亦非討賊也故以兩下相殺
為文齊商人楚虔蔡般則國人君之諸侯會之不知
其為賊矣故春秋亦不得用討賊之例也張氏溥
曰左傳云無知虐於雍廩雍廩因而殺之非如石碯
之以義討也然齊人不能討雍廩討之即有憾庸何
傷是故衛齊均稱人以殺
義雍廩者猶之義石碯也

公及齊大夫盟于莒

莒其器反公穀作暨莒杜注魯地琅瑯縉縣北有莒亭今在山東

兗州府嶧縣東
八十里故鄆城

左傳

齊無
君也

公羊

公曷為與大夫
盟齊無君也

穀梁

公不及大夫大夫不名無君也盟納子糾也

胡傳

及者內為志大夫不名者義繫於齊而不繫於大夫之名氏也曰公及齊大夫盟者譏公之釋

父怨親仇讎也或曰以德報怨寬身之仁何以譏之也曰德有輕重怨有深淺怨莫甚於父母之讎而德莫重乎安定其國家而圖其後嗣也有父之讎而不知怨乃欲以重德報之則人倫廢天理滅矣然則如怨之以直報怨以德報德

集說

范氏甯曰春秋之義內大夫可以會外諸侯公不可以盟外大夫所以明尊卑定內外也今齊

國無君要當有任其盟者故不得以權通禮君前臣名齊無君故大夫不名啖氏助曰穀梁曰無君制在公矣當可納而不納故惡內也案讎人之子本不當納有何惡乎趙氏匡曰納讎人之子損禮而

盟大夫故盟書公及言大夫以明非大夫之罪也所以異於高侯及處父也劉氏敞曰其言及齊大夫何盟納子糾也盟納子糾則何以不名其大夫公之納子糾其所納也若曰為齊大夫則可以納也又曰杜氏曰大夫非一故不稱名非也大夫雖衆固應名其貴者一人而已經曰及諸侯晉大夫盟豈晉國大夫皆在邪孫氏覺曰春秋之義魯公及外大夫盟非外大夫之罪則書人不言其名者成二年盟于蜀是也外大夫及公盟而伉公者則沒公而書名若但與微者也莊二十二年及齊高侯盟于防是也蓋曰諸侯君也外大夫臣也君有常尊臣有常卑所以正君臣之分而防僭禮之萌也以大夫之卑而敵諸侯之尊大夫之罪也明書大夫之名以著其罪沒我公之號示不與大夫之得僭也以諸侯之尊而求與大夫盟者則魯公之罪也明書魯公之及以著其罪沒大夫之名以人書之不與大夫之敵諸侯若微者則

不嫌也公及齊大夫盟于莒既書公矣又書大夫而不名公則有罪而大夫無嫌也莊公父見弑於齊不以復讎為念而為齊立君又屈諸侯之尊以與大夫盟公則有罪矣齊之大夫無君於上而公子在外故以一時之權仇公而盟于莒聖人深察人情之難而盡一時之變也公則有罪而大夫無嫌故變例而書之朱子曰以直報怨者不以私害公不以曲勝直當報則報不當報則止一觀夫理之當然聖人之心終不使人忘怨而沒其報復之名者亦以見夫君父之讎有不得不報者而申夫忠臣孝子之心也若於其所怨而反報之以德誠若忠且厚矣而於君父之讎亦將有時而忘之豈不悖天理之甚也哉或曰君父之讎亦有當報不當報之別乎曰周禮有曰殺人而義者令勿讎此不當報者也春秋傳曰父不受誅子復讎可也此當報者也當報而報不當報而止是即所謂直也

李氏廉曰春秋於莒之盟書齊大夫

扈之盟書晉大夫其詞雖同然齊無君而書大夫非
貶詞又書公及則大夫無仇公之嫌而罪公之及齊
明矣晉靈初即位而趙盾書大夫則趙盾之專可知
其書公會雖譏公之後至然乃所以見趙盾之強諸
侯為此盟也又曰子糾三傳皆以為當納趙子程子
胡氏以為不當納所以然者杜氏以子糾小白並齊
僖之子而糾長故當立穀梁曰齊無知弑襄公公子
糾公子小白出亡故當立穀梁曰齊無知弑襄公公子
兄故亦以為當立獨程子用史記證之而定以糾為
襄公子於是魯納讎之罪明定以糾為小白弟於是
糾不當立之義著然後糾不書子小白之繫齊管仲
之不死魯之忘親釋怨皆得其說矣邵氏寶曰盟
以謀納糾內則釋怨親讎外則輔少伉長如倫
理何人莫甚於父母之讎國莫大於少長之序

夏公伐齊納糾齊小白入于齊

左作納
子糾

左傳

夏公伐齊納子糾桓公自莒先入

穀梁

大夫出奔反以好曰歸以惡曰入齊公孫無知弑襄公公子糾公子小白不能存出亡齊人殺

無知而迎公子糾於魯公子小白不讓公子糾先入又殺之於魯故曰齊小白入于齊惡之也

胡傳

左氏書子糾二傳曰伐齊納糾君子以公穀為正納者不受而強致之稱入者難詞糾不書子

者明糾不當立也以小白繫齊者明小白宜有齊也所以然者襄公見殺糾與小白皆以庶子出奔而糾弟也又未嘗為世子案史稱周公誅管蔡以安周齊桓殺其弟以反國是糾幼而小白長其有齊宜矣宜則何以不稱公子內無所承上不稟命故以王法絕之也

集說

范氏甯曰春秋於內公子為大夫者乃記其奔子糾不為大夫故不書其奔鄭忽既受命嗣位

是以書其出然則重非嫡嗣官非大夫皆事例所略故許叔蔡季小白重耳通亦不書出何休曰三年溺會齊師伐衛故賤而名之四年公及齊人狩于郕故卑之曰人今親納離子反惡其晚恩義相違莫此之甚甯謂離者無時而可與通縱納之遲晚又不能全保離子何足以惡內乎然則乾時之戰不諱敗齊人取子糾殺之皆不迺其文正書其事內之大惡不待賤絕居然顯矣二十四年公如齊親迎亦其類也惡內之言傳或失之杜氏預曰二公子各有黨故雖盟而迎子糾當須伐乃得入又出在小白之後小白稱入從國逆之文本無位孔氏穎達曰昭十三年傳稱桓公有國高以為內主則國子高子是小白之黨也彼迎小白既早公送子糾又遲公伐齊納子糾始行即書小白入齊得告乃書故至齊之時出小白之後也傳例曰凡去國國逆而立之曰入小白稱入從國逆之文以其本無位也若本有位則當云復歸

孫氏復曰夏公伐齊納子糾其言齊小白入齊者
小白爭立也言入者皆非世嫡劉氏敵曰公羊云
納者入辭也非也納者納辭耳得入不得入未可知
也非入辭也又曰伐而言納者猶不能納也亦非也
有伐而納者有圍而納者有未嘗伐未嘗圍而納者
各據實書之耳糾不稱公子君前臣名也非也糾失
國在魯本非魯臣何以責以君前臣名乎且若稱公
子糾則可謂非君前臣名乎又云以國氏者當國也
非也凡言當國之說皆無通例不可條貫孫氏覺
曰春秋之義納者不宜納也桓公見弑於齊齊之與
魯有不同天之讎仇讎之國無時而可與通也莊公
忘君父之大讎伐齊而納讎人之子書曰納者不宜
納也程子曰桓公子糾襄公之二子也桓公兄而
子糾弟襄公死則桓公當立春秋書桓公則曰齊小
白言當有齊國也於子糾則止曰糾不言齊以不當
有齊也不言子非君之嗣子也公穀并注四家皆書

納糾左傳獨言子糾誤也然書齊人取子糾殺之者齊大夫嘗與魯盟于莒既納糾以為君又殺之故書子是二罪也胡氏銓曰齊不受子糾而公必納之故先書公伐齊見齊不受子糾也次書納糾見公黨讎之子也朱子曰程子以薄昭之言證桓公之為兄則荀卿嘗謂桓公殺兄以爭國而其言固在薄昭之前矣蓋未可以此證其必然但以公穀春秋所書之文為據而參以夫子荅子路子貢之言斷之可也蓋聖人之於人不以罪掩其功亦不以功掩其罪今於管仲但稱其功不言其罪則可見不死之無害於義而桓公子糾之長少亦從以明矣又曰仲之所以不死者正以小白兄而子糾弟耳若使糾兄而當立則齊國之士君臣之義無所逃矣陳氏傅良曰凡納所宜納皆不書必不宜納也而後書襄公吾讎也而納其亡公子以為德是納不宜納也呂氏大圭曰伐齊納糾欲納之而實未能納也故納而得入則

書其國楚人納頓子于頓楚人納公孫寧儀行父于
康是也未得國而入於邑則書邑齊高偃納北燕伯
于陽晉趙鞅納世子蒯瞶于戚是也莊公納子糾以
國則小白已君以邑則糾未能入故但書納以見其
不能納也張氏洽曰左氏作納子糾今從公羊穀
梁作納糾案正義云今定本乃有子字則知左氏古
本亦作納糾矣又曰莊公忘齊之讎而納其公子又
所奉者不正故特書納糾以罪之桓公當立而書入
無王命也使移此以為復讎之師魯其庶乎春秋書
以納糾也使移此以為復讎之師魯其庶乎春秋書
其故以其非讎齊而德齊也吳氏澂曰齊人初欲
迎糾既而當國者知糾之不如小白故拒糾而召小
白先入於國而奉以為君小白之立蓋齊國公議為
社稷計也則小白乃齊國之所共戴而糾特魯君之
所私納故曰齊小白言其當為齊君也入者難詞雖
齊大夫之所欲立然有魯兵見伐奉糾爭國故小白

亦藉莒兵護送而後得入齊非如歸之易也 李氏
廉曰春秋書納七皆不當納也糾不書公子與捷菑
同公之伐戰與晉之弗克納異糾捷菑以庶孽書納
蒯賁以世子亦書納蒯賁無親之罪大也蒯賁得書
世子而糾捷菑不書公子者書世子以著靈公之失
也楚之納頓子納公孫寧儀行父齊之納北燕伯皆
內弗受之謂也糾郤鼎同此義又曰公子入國而繫
國者齊小白莒去疾齊陽生皆宜有國者也 汪氏
克寬曰杜氏注小白僖公庶子糾小白庶兄公羊
謂小白稱入為篡詞穀梁謂小白不讓子糾太史公
序小白次子糾皆以子糾為兄小白為弟且謂皆僖
公子韓宣子亦謂齊桓衛姬之子有寵於僖而程子
謂襄公子也據左傳公子小白公子糾蒙襄公立而
言今考小白子糾其為僖公或襄公之子則不可考
然以經考之忽繫鄭而突不繫鄭羈繫曹而赤不繫
曹則嫡庶之辨也捷菑不繫邾而書弗克納則長幼

之辨也今小白繫齊則鄭忽曹羈之例也糾不稱子而稱納則捷菑之例也是則小白當立而糾不當立明矣以經別傳之真偽則公穀杜氏不可信也況夫子盛稱管仲之功而不責其忘君事讎別其長幼是非豈不灼然可見哉魯莊忘讎而納其公子奉少奪長興師以助不正卒至於敗書公伐齊書納而罪惡著矣又曰有當入而言入者難詞也有不當入而言入者逆詞也許叔之入小白之入當入者也鄭突之入衛朔之入不當入者也齊陽生入于齊與此書法雖同然下書陳乞弑荼則知陽生之入所以篡荼矣讀經當合上下文觀之

案左氏經文公伐齊納子糾繫子糾於糾而不繫於小白是以子糾為兄也公穀經文雖稱糾不繫子而公羊謂糾宜君穀梁謂糾可立亦以子糾為兄也三傳注疏竝無異說其見於他書者荀卿謂桓公殺兄史

記序糾於小白之上蓋皆以子糾為兄也獨薄昭與淮南王書謂齊桓殺弟韋昭注曰子糾糾兄也言弟者諱也趙氏汭曰時漢文於淮南為兄故避兄而言弟是則薄昭所云乃一時遷就之語而非不易之論也程子及胡傳據公穀經文稱糾不繫子遂直以糾為弟而諸家多因之夫公穀之傳所以釋經也取其經而背其傳不幾進退兩無據乎朱子論語或問引用程子說而其荅潘友恭書又引荀卿殺兄之語而以薄昭所云為未必然蓋兩存之而未嘗有所偏主也今故從朱子而兩存之再考叔向謂齊桓為衛姬之子有寵於僖史記謂襄公次弟糾次弟小白又謂小白母衛女也其說與叔向同杜氏預謂小白僖公庶子子糾小白庶兄是俱以糾與小白為僖公子也獨穀梁謂無知弑襄公公糾糾公子小白出亡啖氏助趙氏匡主穀梁之說謂襄被弑二公子乃出奔以二公子為襄公之子程子及胡傳皆主之二說未詳孰

是亦竝
存焉

秋七月丁酉葬齊襄公

集說

杜氏預曰九月乃葬亂故張氏洽曰無知已誅可以葬矣陳氏際泰曰卒王姬不得不卒

也葬齊襄公
不得不葬也

八月庚申及齊師戰于乾時我師敗績

乾音干杜注齊地時水

在樂安縣界支流旱則竭涸故曰乾時今樂安故城在山東青州府博興縣北時水在縣南

左傳

師及齊師戰于乾時我師敗績公喪戎路傳乘而歸秦子梁子以公旗辟於下道是以皆止

胡傳

案左氏戰于乾時公喪戎路傳乘而歸則敗績者公也能與讎戰雖敗亦榮何以不言公敗之

也公本忘親釋怨欲納讎人之子謀定其國家不為復讎與之戰也是故沒公以見貶若以復讎舉事則此戰為義戰當書公冠於敗績之上與沙隨之不得見平丘之不與盟為比以示榮矣惟不以復讎戰也是故諱公以重貶其忘親釋怨之罪其義深切著明矣

集說

趙氏匡曰內敗不書此書者納讎喪師以惡內也劉氏敞曰此言敗何公佚獲也戰而大敗

蓋僅然後免爾師敗恥也佚獲辱也恥可言辱不可言也公羊曰內不言敗此言敗者伐敗也非也若魯實以復讎而戰者春秋不宜不言公若以復讎者在下故不言公春秋豈奪人臣子意哉臣有善言君行之則君善也奈何以復讎者在下則不以其美歸公哉程子曰及其師非卿也公戰諱敗凡言敗績大敗也小小勝負不書趙氏鵬飛曰春秋內戰未外書敗績者皆為之諱也今乾時之戰內忘父讎而外

為齊納不當立之君莊公之過非徒日月之食也終
身之罪也尚何足為諱哉或者以我伐齊為有復讎
之名故聖人與之不諱其敗噫莊所納者讎之子而
名為復讎有是理乎汪氏克寬曰書齊師書我師
則非師少矣上文書公及齊大夫盟公伐齊則此戰
乃公及之戰不待考傳而知之也然不書公而以微
者之辭及戰者所以著公志在於納糾而不在於敵
讎也經書內戰者三書敗外師者八言敗者勝彼言
戰者為彼所勝也內諱敗言戰乃敗矣故奚升陘皆
不言敗績升陘諱公不書為公諱敗也獨此書敗績
湛氏若水曰魯與齊之讎不共戴天也莊公忘復
讎之義為納糾之舉而與之戰其道已顛實矣焉得
而不敗季氏本曰莊公輔邪奪正志在必爭乾時
之戰書及在魯以見齊人本不欲戰而魯決求一逞
也王氏錫爵曰齊讎國也而
為之納君即致敗衄其誰憐之

九月齊人取子糾殺之

左傳

鮑叔帥師來言曰子糾親也請君討之管召讎也請受而甘心焉乃殺子糾於生竇召忽死之

管仲請囚鮑叔受之及堂阜而稅之歸而以告曰管夷吾治於高僂使相可也公從之

生竇杜注魯地史記作笙瀆賈逵曰句瀆也今山東兗州府曹州北有句陽古城即句瀆故地

堂阜杜注齊地東莞陰縣西北有夷吾亭鮑叔解夷吾縛於此因以為名今堂阜在山東青州府蒙

陰縣西北

公羊

其取之何內辭也脅我使我殺之也

穀梁

外不言取言取病內也取易辭也猶曰取其子糾而殺之云爾十室之邑可以逃難百室之邑

可以隱死以千乘之魯而不能存子糾以公為病矣

胡傳

取者不義之詞前書納糾不稱子者明不當殺也此書殺糾復稱子者明不當殺也或奪或予

於義各安春秋精意也仁人之於兄弟不藏怒焉不宿怨焉親愛之而已糾雖爭立越在他國置而勿問可也必請於魯殺之然後快於心其不仁亦甚矣後世以傳讓為名而取國者必殺其主以為一人人心防後患意與此同流毒豈不遠哉故孟子曰五伯三王之罪人也仲尼之徒無道桓文之事者

集說

賈氏達曰稱子者慙之劉氏敞曰此魯人殺也則其曰齊人取之何甚齊侯也內私人之國

而奪焉外敗人之師而脅焉是取其子糾戮之而已矣蘇氏轍曰子糾之死魯殺之也其曰齊人取子糾殺之何也不予齊人之使魯殺其親也故使齊其尸之且曰有國而不能庇一人亦所以病魯也公羊

曰稱子糾宜為君也或因公羊而益之曰此殺未踰年之君也夫子糾小白爭國未知孰宜為君也未知孰宜為君納而未得入而以為未踰年之君也可乎高氏閔曰桓公殺子糾書齊人者并其國人罪之也書曰取殺之重之也張氏洽曰糾者齊桓公之兄弟也以其不當爭而爭立則為罪以其骨肉之至親則不可殺為齊桓者當列其罪以告諸人且明示親親之義而全其生則恩義兩得矣夫殺兄弟當目君而稱齊人者廢立之際殺生予奪寄於當國大臣之手毫釐之差霄壤之謬今齊大夫始以糾為先君之子而盟欲立之始謀不審已為罪矣及桓公得國又不體其君天倫之恩從議親之辟以赦其罪而必殺之廢興生死輕率甚矣故加子於糾又書齊人書取書殺以責其舉國君臣忘親失義之罪也家氏鉉翁曰此桓公殺之而書齊人殺子糾以路人絕之於天倫所以大誅斥之也魯不能納糾又使受

而甘心焉魯亦有罪矣吳氏澂曰齊立小白魯亦立糾以與小白爭國小白立而魯師還則糾乃一亡公子寄寓於魯者爾何罪而齊欲殺之乎今齊有君而魯又立糾是齊有二君矣勢固不兩立也魯兵戰敗力不敵齊故齊聲子糾爭國之罪偏魯殺之魯不能亡遂殺之於生實殺之者雖魯從齊令也是猶齊人取之於魯魯以畀齊而殺之焉爾所以著子糾之死皆魯之罪也李氏廉曰子糾書法與子般子野同故公穀皆以為貴而當立殊不知前不書子責子糾以天倫之義此復書子責桓公以天倫之恩也汪氏克寬曰王者之道自修身正家以及於為國桓公殺子糾晉文殺懷公以取國夫子糾懷公論長幼之序雖不當立而桓文之殺亦非也以是得國而霸諸侯其本固已不正矣此仲尼之門五尺童子所以羞稱五霸也殺懷公之事不見於經非善之也舊史不存耳邵氏實曰魯方伐齊納糾今取而殺之何

其易也意出於齊而歸討於魯將誰欺乎又曰糾雖不當立然無可殺故納也不子殺也子之子之而可殺孰不可哉此齊人之罪也於魯何如取之者齊聽之者魯李氏本曰殺糾不言地殺之於魯也子糾之難召忽死之而春秋不書者蓋糾弟也桓公兄也召忽輔糾所事已不正矣孔子比之匹夫匹婦自經於溝瀆而不知也可以為萬世之公案矣黃氏正憲曰魯莊納糾有四罪忘讎德怨一輔邪姦正二事定復戰三既納復殺四張氏溥曰鄭莊公之克段也使餉其口於四方而已春秋猶惡其志存於殺小白既為君矣糾避焉可也必取而殺之是糾罪薄於太叔而小白忍於鄭莊也既之盟魯許納糾敗於乾時即聽殺糾其初盟也不知擇義其既敗也不知守信魯自是為齊役矣浚洙以備何益乎

冬浚洙

洙音殊

公羊

洙者何水也浚之者何深之也曷為深之畏齊也曷為畏齊也辭殺子糾也

穀梁

浚洙者深洙也著力不足也

胡傳

固國以保民為本輕用民力妄興大作邦本一搖雖有長江巨川限帶封域洞庭彭蠡河漢之

險猶不足憑而況洙乎書浚洙見勞民於守國之末務而不知本為後戒也

集說

孫氏覺曰春秋之義凡興作書之皆罪張氏洽曰洙水在魯北齊伐魯之道也魯雖殺子糾

猶有畏齊之心故浚而深之以備齊師之至書此以見其不能明政刑結人心使大國畏之而重勞民力務以深險自守不知困民於無益古人微彼桑土綢繆牖戶之意不如是之陋也汪氏克寬曰城郭溝池有國者之所不可廢然有當守而不可不守者有不必徒恃於守者春秋書滅下陽書城虎牢責虢鄭

之不能守也書浚洙書內築城邑者一十有四所以
責魯之徒恃於守而重困民力也湛氏若水曰非

所當作而作
雖時非也

丁莊王十年齊桓二年晉緡二十一年衛惠十六年
西三年蔡哀十一年鄭厲十七年子儀十年曹

莊十八年陳宣九年杞靖二十年
宋閔八年秦武十四年楚文六年

春王正月公敗齊師于長勺

勺上酌反長勺杜注魯
地路氏曰成王以商民六

族錫魯公有長勺氏尾
勺氏此商民所居也

左傳

十年春齊師伐我公將戰曹劌請見其鄉人曰
肉食者謀之又何間焉劌曰肉食者鄙未能遠

謀乃入見問何以戰公曰衣食所安弗敢專也必以
分人對曰小惠未徧民弗從也公曰犧牲玉帛弗敢

加也必以信對曰小信未孚神弗福也公曰小大之獄雖不能察必以情對曰忠之屬也可以一戰戰則請從公與之乘戰于長勺公將鼓之劇曰未可齊人三鼓劇曰可矣齊師敗績公將馳之劇曰未可下視其轍登軾而望之曰可矣遂逐齊師既克公問其故對曰夫戰勇氣也一鼓作氣再而衰三而竭彼竭我盈故克之夫大國難測也懼有伏焉吾視其轍亂望其旗靡故逐之

胡傳

齊師伐魯經不書伐意責魯也詐戰曰敗敗之者為主或曰長勺魯地而齊師至此所謂敵如

於已不得已而後應者也疑若無罪焉何以見責乎善為國者不師善師者不陣善陣者不戰故行使則有文告之詞而疆場則有守禦之備至於善陣德已衰矣而況兵刃相接又以詐謀取勝乎故書魯為主以責之皆已亂之道寡怨之方王者之事也

集說

杜氏預曰齊人雖成列魯以權譎稽之列成而不得用故以未陳為文孔氏穎達曰例稱敵

未陳曰敗某師皆陳曰戰此傳稱齊人成陳擊鼓不應稱敗齊師故解之孫子兵書曰誓稽之使失其先後謂稽留彼敵不時與戰使先後失其次第魯以曹劌之語權謀譎詐以稽留之列成而不得用與未陳相似故以未陳為文啖氏助曰凡魯勝則曰敗某師孫氏復曰報乾時之戰也斥言公者惡其伐齊納糾喪師乾時不自悔過復敗齊師於此也張氏洽曰書敗而不書戰惡詐戰也用民力以戰爭古有司馬車戰之法定日刻期兩陳相向以決勝負雖敗而奔亦無多殺之禍若詐戰而出其不意或舉衆而覆之則不仁之甚者也莊公政刑不修制軍無法齊師之來以詐謀而僥倖一勝春秋深譏之程氏端學曰不書伐而書敗某師書法與隱十年公敗宋師于菅同汪氏克寬曰或謂莊公與離國為敵聖人

幸其勝而志之也嗟夫使莊公於即位之初悉索敝
賦以問罪於齊而有再戰再勝之功則為善者也乃
挾不能納糾之憤而逞其狙詐何有於敵讎苟以為
敵讎則侵宋再敗宋師非敵讎也邵氏實曰敗之
云者以詐戰之法施之或謂齊已陳而鼓之何詐之
有不知蒯之稽師所以為詐也自後世兵家言之可
謂勝算矣三代之用師必不若是斯民也三代之所
以直道而行也何獨於兵而不然此聖人所以待斯
世之意也金氏賢曰觀長勺之勝則魯與齊戰我
豈盡出其下哉使莊公移乾時之戰於魯桓遇弑之
時移長勺之戰於齊襄未死之日則勝亦榮也敗亦
榮也莊公之師不用之以復父讎而用之以納子糾
也可勝
歎哉

案外兵加魯以主客為予奪意責外則書來戰意責
內則勝書敗某師敗書及某師戰此定法也魯莊於

齊既忘仇讎而修甥舅之禮一旦乘齊之喪納讎子而伐之及齊師來伐又憤然而與戰故經以魯為主而不書齊伐胡傳以為意責魯不可易矣或謂閔魯積弱又謂齊為讎國故幸其勝而喜之然則乘丘及鄆公先侵宋既無強弱之嫌宋非讎國復何所喜乃亦不言宋伐止書敗宋師也邪故諸為異論者悉擯取不

二月公侵宋

此書侵之始

公羊

曷為或言侵或言伐猶者曰侵精者曰伐戰不言伐圍不言戰入不言圍滅不言入書其重者也

集說

孫氏復曰公既敗齊師于長勺又退而侵宋結怨二國劉氏敞曰曷為或言侵或言伐無鐘

鼓曰侵有鐘鼓曰伐侵淺事也伐精事也杜氏諤曰周官九伐之法負固不服則侵之此蓋天子命諸侯使侵之非列國可得而專春秋之世侵伐戰圍者甚衆必詳錄之以示譏也張氏洽曰莊公以僥倖得志於齊遂舉無名之師以掠宋境此所以致郎之師也黃氏仲炎曰稱罪而討其國曰伐不稱罪而掠其境曰侵即書所謂侵于之疆是也春秋書侵伐雖有異詞而均之為挾私逞忿無王命而專兵焉爾陳氏深曰凡書侵伐不書勝敗掠而還也汪氏克寬曰趙氏纂例駁三傳侵伐之說而謂聲罪致討曰伐無名行師曰侵然齊桓侵蔡劉文公侵楚豈可謂無名行師乎文定改之曰潛師掠境曰侵其義當矣

三月宋人遷宿

此遷國之始

穀梁

遷亡辭也其不地宿不復見也
遷者猶未失其國家以往者也

胡傳

其曰遷宿者宿非欲遷為宋人之所遷也懷土
常物之大情遷國重事也雖違害就利去危即

安猶或恐沈於衆不肯率從而沉迫於橫逆非其所
欲棄久宅之田里刈新徙之蓬藿道途之勤營築之
勞起怨謗傷和氣豈不惻然有隱乎肆行莫之顧
也其不仁亦甚矣凡書遷不再貶而惡已見矣

集說

范氏甯曰為人所遷則無復國家故曰亡辭閔
二年齊人遷陽亦是也國亡不復見經不言滅

者言滅則殺其君滅其宗廟社稷就而有之不遷其
民謂自遷者僖元年邢遷于夷儀成十五年許遷于
葉之類是也彼二傳曰遷者猶得其國家以往者也
此傳云遷者猶未失其國家以往互文也陸氏淳
曰啖子曰凡言遷者有二義如宋人遷宿齊人遷陽
是移其國於國中而為附庸也如邢遷于夷儀衛遷

于帝丘之類或自請遷或見彊遷皆猶為列國故不言某人遷之言所遷之地但言移國都而已非為附庸也趙子曰凡非所遷而遷之其惡著矣孫氏復曰宿微國天子封之宋人遷之其惡可知劉氏敞曰遷者何遷之者何遷者其欲也遷之者非其欲也遷者其國家復見者也遷之者其國家不復見者也宿者何國也蘇氏轍曰凡諸侯遷國自遷曰某遷於某人遷而有之曰某人遷某猶以為附庸也故不言滅王氏葆曰驅而屬之為附庸自是宿不復見則亦亡矣宋閔所為如此閔三載而見弑於賊臣豈不曰天道好還哉許氏翰曰遷之使未失其國家以往其義猶有所難則是王澤之未竭也僖文以後有滅國無遷國矣高氏閔曰宿介於宋魯之間屬於宋而親魯宋人以為貳於魯而遷之胡氏寧曰有不利焉意欲自遷則何惡矣或介乎大國為人之所遷者春秋閔之李氏廉曰左氏穀梁同公羊因

而臣之說亦是而不通之詞迂僻無義故不取
汪氏克寬曰書遷國邑者三自遷者七宋遷宿齊遷
紀邾鄆鄆遷陽皆強遷之而取其地者也邾遷夷儀
衛遷帝丘許遷葉夷白羽容城蔡遷州來皆以自遷
為文者也然唯邾衛乃迫而自遷蔡許為人所遷然
遷而不滅則曰某國遷於某遷而遂滅則曰某人遷
某國也邾遷如歸齊桓得興滅繼絕之義春秋
秋二百餘年之最善者後莫有繼之者矣

夏六月齊師宋師次于郎公敗宋師于乘丘

乘繩證反
乘丘杜

注魯地西漢泰山郡有乘丘縣顏師古曰即春秋乘
丘也括地志乘丘在瑕丘縣西北三十五里今山東
兗州府滋陽縣
西有古瑕丘城

左傳

夏六月齊師宋師次于郎公子偃曰宋師不整
可敗也宋敗齊必還請擊之公弗許自雩門竊

出蒙皋比而先犯之公從之
大敗宋師于乘丘齊師乃還

穀梁

次止也
畏我也

胡傳

齊宋輕舉大衆深入他境肆其報復之心誠有罪也魯人若能不用詐謀奉其辭令二國去矣

偷得一時之捷而積四鄰之忿此小人之道
故次者不以其事勝者不以其理交識之

集說

趙氏匡曰公羊云齊與伐而不與戰故言伐也
案經文實未伐而敗故不言伐爾又曰我能敗

之故言次若然則但書敗義不明乎何假言次
氏敞曰齊宋輕用其衆揚兵整旅以徑人之國而不
名所伐欲闢利乘便快其攻取之意故使魯人恫疑
憂恐出奇計詐謀以自救覆滅其軍百姓父子無辜
陷沒此人君貪利輕用其衆之罪也杜氏諤曰公
不能復讎而反納子糾以啟齊之寇又侵宋以衆其

敵致二國同次于郎公雖敗宋不足為羨許氏翰
曰齊桓始入未撫其民而輕用之是以再不得志於
魯晉文之入五年而後用其民蓋監此也陳氏傳
良曰其言次何以桓公之圖伯而未集也外師未有
書次者桓公所甚汲汲者魯也苟不得魯不可以合
諸侯宿師于郎將以誅魯耳而北杏之會不至鄆會
不至則猶未得志於魯也於是書次用見桓之未得
志於諸侯也是故書齊師宋師次于郎以志齊伯之
難書楚子蔡侯次于厥貉以志楚伯之難於此焉可
以知人心矣不苟於從齊是人心猶有周也不苟於
從楚是人心猶有晉也有王者作天下歸往之矣
李氏廉曰齊之忽魯始於子糾之納宋之忽魯始於
公之侵而其實則齊桓挾宋以圖伯也故胡氏發明
於次敗之旨而陳氏深察於齊宋之心二說兼用乃
備汪氏克寬曰齊宋書師著兵力之強也書次見
其師出之無名也魯書公書敗見其以千乘之君而

勝人不以其道也記稱戰于乘丘馬驚敗績公隊佐車授綏則雖能勝宋魯亦殆矣此春秋所以目公而譏之也與

秋九月荆敗蔡師于莘以蔡侯獻舞歸

莘所中反舞穀作武莘杜注

蔡地在今河南汝寧府汝陽縣境

左傳

蔡哀侯娶於陳息侯亦娶焉息媯將歸過蔡蔡侯曰吾媯也止而見之弗賓息侯聞之怒使謂

楚文王曰伐我吾求救於蔡而伐之楚子從之秋九月楚敗蔡師于莘以蔡侯獻舞歸

公羊

蔡侯獻舞何以名絕曷為絕之獲也

穀梁

其言敗何也釋蔡侯之獲也以歸猶愈乎執也

胡傳

蔡侯何以名絕之也凡書敗書滅書入而以其君歸皆名者為其服為臣虜故絕之也若蔡獻

舞潞

嬰兒沈嘉許斯頓牂胡豹曹陽邾益之類是矣

楚人滅夔

以夔子歸獨不名者夔子以無罪見討雖

國滅身為臣虜其義直其辭初不服也是以獨假之爵而不名也春秋之法諸侯不名失地則生而名

之比於賤者欲使有國之君戰戰兢兢長守富貴無危溢之行也

集說

孔氏穎達曰荆楚一木二名故以為國號亦得二名終莊公之世經皆書荆僖之元年乃書楚

人伐鄭以後常稱楚也又曰穀梁傳曰以歸猶愈乎執也杜於隱七年注云但言以歸非執也則以歸者

直將與共歸不被囚執其恥輕於執也孫氏復曰荆自方叔薄伐之後入春秋肆禍復甚聖王不作故

也高氏閔曰王室衰微不能自救齊桓始入威令不行是以荆人強暴敢於肆毒也朱子語類曰荆

楚初書國進稱人從卑稱也後漸大故稱爵吳氏
澂曰蔡侯為荊所獲而以之歸留於楚九年至莊十
九年卒李氏廉曰楚文王立於莊之四年方是時
承武王之烈內有鄧曼為之母外有令尹鬬祁莫敖
屈重等為之臣為會漢油而隨人不能乘其喪鄧不
血食而三甥無以謀其暴於是楚勢不可遏矣莊之
十年齊桓方謀魯以圖伯於東而荊亦執蔡以爭強
於南故執君滅國之禍皆始於此年又曰楚書荊始
此年書荊人始莊二十三年書楚人始僖元年書楚
大夫姓名始僖四年書楚子始僖二十一年汪氏
克寬曰史記周文王封祝融之苗裔熊繹於楚蠻封
以子男之田夷王時王室微熊渠甚得江漢間民和
熊渠立為王厲王暴虐熊渠畏其伐去王號十一世
至熊通伐隨令請王室尊為王王不聽乃自立為武
王子文王始強陵江漢間小國敗蔡即此時也公穀
皆謂書荊以州舉杜預謂荊其本號後改為楚今考

檀弓謂夫子將之荆晉語叔向謂荆敗我則荆或是
楚故號然商頌稱荆楚則荆改號楚已久或者如鄉
改號小邾而仍稱邾申稱滕薛邾蓋春秋略之故舉
其故號耳嘗考近楚之國自申息諸國既亡惟陳蔡
為密邇故二國屢受侵伐且見滅而僅存蔡之君自
獻舞已降死於楚者三焉春秋之書楚患始之以荆
敗蔡而終之以楚公子
申伐陳聖人蓋傷之也

冬十月齊師滅譚譚子奔莒

此滅國之始譚杜注譚國在濟南平陵縣西南今

山東濟南府歷城縣
東南七十里有譚城

左傳

齊侯之出也過譚譚不禮焉及其入也諸侯皆
賀譚又不至冬齊師滅譚譚無禮也譚子奔莒

同盟
故也

公羊

何以不言出國已滅矣無所出也

胡傳

滅而書奔責不死位也不書出國亡無所出也國滅身奔而不能守其富貴何以書爵乎已無

取滅

之罪為橫逆所加而力不能勝至於出奔則亦不幸焉爾矣其義蓋未絕也案左氏齊侯之出也過

譚譚

不禮焉及其入也諸侯皆賀譚又不至責其失事大之禮可矣坐此見滅可乎齊師滅譚譚子奔莒

楚人滅

弦弦子奔黃狄滅溫溫子奔衛三國所以皆存其爵不比於失地之君而名之也然則吳滅徐徐

子章羽奔

楚何以獨名案左氏吳伐徐徐子斷其髮攜其夫人以逆吳子既已屈服而後奔豈有興復之

志乎獨書

名所以絕之也春秋之義雖在於抑强扶弱又責弱者不自强於為善也故其書法如此

集說

范氏甯曰譚子國滅不名蓋無罪也凡書奔責不死社稷孫氏覺曰春秋之法滅有三例國

滅而其君死之者書滅莊公十三年齊人滅遂是也
國滅而其君出奔者書奔齊師滅譚譚子奔莒是也
滅其國以其君歸者書歸僖二十六年楚人滅夔以
夔子歸是也春秋之義就其可責者責之不責其所
不能也強大之國以兵加弱小之諸侯滅人之國而
殺人之君其罪不容誅也國為之滅而身為之死者
非無罪聖人方深誅滅者之罪不得不少緩死者之
責故滅而其君死之者但書曰滅不更出死者之名
以深罪滅其國而殺其君也土地不能守宗社不能
全愛其死而奔亡於外者則書滅書奔罪其不能死
社稷也國為之滅而民人為之有也宗祀又有不能
全焉是有不同天之讎而乃苟完其一身隨之歸而
為之臣蓋其罪不可勝誅矣故書滅書歸又書名也
滅人之國者其例則三而其罪則一為人所滅者其
罪之輕重有三科焉此春秋所以辨罪惡之深淺而
示誅責之輕重也胡氏寧曰管仲相桓公霸諸侯

只是說遇如譚有恨便滅之鄭可取便降之若學聖人則行一不義殺一不辜而得天下不為也薛氏季宣曰五伯桓公為盛威陵諸侯以圖伯功首滅天子之建侯以肆威耳儒者之不道也宜哉陳氏傳良曰書滅始於此紀侯大去宋人遷宿未可以言滅必若齊桓而後可以言滅矣然則滅國自齊桓乎前此矣曷為以首滅罪齊微桓公則滅國之禍不接迹於天下春秋滅國三十六五伯為之也張氏洽曰齊桓方有志為政於天下非特不能興滅繼絕而以私憾覆滅小國其罪大矣李氏廉曰啖子曰凡滅國直書滅者罪來滅者甚於見滅者言力屈而死也如蕭邢之類則遂黃頤江六庸舒蓼甲氏留吁舒庸萊舒鳩賴蔡州來巢不書君奔當入此例凡書滅又書其君奔者則兩罪之且責其不死社稷也如譚弦溫徐之類是也凡書滅又書以歸又書名者既責其不死又無與復之志如潞嬰兒沈嘉許斯頓牂胡豹

之類也其書滅鄆非滅而書滅下陽不當書滅而書滅則又變例也以偃陽子歸不書陸渾子奔楚不書免其罪也胡髡沈盈一戰而身國俱亡也楚滅陳不書所奔陳無君也夔子不名無罪也徐子書名已屈節也已上胡氏皆用啖子之說故詳錄之左氏曰用大師曰滅公羊曰滅者亡國之善辭上下之同力也皆可通外傳曰軍譚遂而不有也言以地分諸侯蓋誇大桓公之詞耳汪氏克寬曰齊桓圖伯之初滅譚遂降鄆遷陽專以威力陵暴小國以恐懼天下之諸侯其後雖能存三亡國而功不足以掩過矣春秋書荆敗蔡師于芊以蔡侯獻舞歸齊師滅譚譚子奔莒則齊桓亦熊賁之為耳不待貶絕而惡自見矣

戊戌
莊王十
四年

十有一年

齊桓三年晉緡二十二年衛惠十七年蔡哀十二年鄭厲十八年子

儀十一年曹莊十九年陳宣十年杞靖二十一年宋閔九年秦武十五年楚文七年

春王正月

夏五月戊寅公敗宋師于鄆

鄆子斯反鄆杜注魯地當在今兗州府境與元年

在都昌縣西者乃二地

左傳

十一年夏宋為乘丘之役故侵我公禦之宋師未陳而薄之敗諸鄆凡師敵未陳曰敗某師皆

陳曰戰大崩曰敗績得傷曰克覆而敗之曰取某師京師敗曰王師敗績于某

集說

孫氏復曰此言五月戊寅公敗宋師于鄆者甚之也公二年之中三敗齊宋之師可謂甚矣

王氏葆曰宋既敗而不知懲魯既勝而不知止其黷武甚矣張氏洽曰宋師再至再敗兵禍旋及其君魯雖再勝其國亦困於兵矣趙氏與權曰宋報復之師也屢役不勝可以已矣莊公以兵始禍屢勝鄰

國能無悔乎 汪氏克寬曰傳
言侵我經不書侵與長勺義同

秋宋大水

左傳

秋宋大水公使弔焉曰天作淫雨害於衆盛若

憂拜命之辱臧文仲曰宋其興乎禹湯罪已其興也
悖焉桀紂罪人其亡也忽焉且列國有凶稱孤禮也
言懼而名禮其庶乎既而聞之曰公子御說
之辭也臧孫達曰是宜為君有恤民之心

公羊

何以書
記災也

穀梁

高下有水
災曰大水

胡傳

凡外災告則書所謂災者害及民物如水火兵
戎之寇是也諸侯於四隣有恤病救急之義則

告為得禮而不可以不弔故四國同災許人不弔君子以是知許之先亡也凡志災見春秋有謹天戒恤民隱之心王者之事也

集說

杜氏預曰公使弔之故書孫氏復曰水不潤下也春秋之世災異多矣不可悉書故外災或

舉其一或舉其二以見天下之異也此年秋宋大水二十年秋齊大災僖十六年隕石于宋五六鷁退飛過宋都昭十八年宋衛陳鄭災之類是也劉氏敞曰此宋大水也何以書弔焉爾主人告災不告異諸侯弔災不弔異告異則書之弔災則書之又曰公羊云外災不書此書者及我也案春秋內其國而外諸夏若水災及魯自可記魯災而已無為詳宋而略我也穀梁曰外災不書此何以書王者之後也非也杞亦王者之後未嘗記其災何與又曰異者天所以譴人君使修德也故異至則內自省而已耳非所待於

外也不當告告為失禮失禮則書災者害之及民物者也諸侯於四鄰固有恤病救急之義是所待於外也不可不弔弔為得禮得禮則書呂氏祖謙曰諸國告則書其顯然為衆所知者亦不待告也春秋之世災異多矣聖人不能盡書取其一二甚者以為後世戒張氏洽曰比歲交兵怨不廢禮蓋古意之猶存而未泯者也閔公不能踐敬之一言而以靳宋萬自禍乃董氏所謂出災害以譴告之而不知變者春秋之存災異可不察哉張氏溥曰兵敗於外水災於內宋烏得而不亂

冬王姬歸于齊

左傳

冬齊侯來逆共姬

胡傳

案周制王姬嫁於諸侯車服不繫其夫下王后一等禮亦隆矣春秋之義尊君抑臣其書王姬

下嫁曷為與列國之女同辭而不異乎曰陽倡而陰和夫先而婦從天理也述天理訓後世則雖以王姬之貴其當執婦道與公侯大夫士庶人之女何以異哉故舜為匹夫妻帝二女而其書曰嬪于虞西周王姬嫁於齊侯亦執婦道成肅雍之德其詩曰曷不肅雍王姬之車自秦而後尤欲尊君抑臣為治而不得其道至謂列侯尚公主使男事女夫屈於婦逆陰陽之位又豈所以為治也春秋書王姬侯女同詞而不異垂訓之義大矣

集說

陸氏淳曰公穀皆云志其過我也案書其歸為魯主婚爾穀梁他處即云為之中者歸之與此

自相反矣孫氏復曰羣公受命主王姬者多矣唯元年與此書者惡公忘父之讎再與齊接婚姻也劉氏敞曰何以書我主之也我主之則曷為不言我主之常事不書必非常然後書又曰杜氏曰不書齊

侯逆不見公非也魯為王主婚若齊侯來逆女而公輒不見何謂主婚矣乃常事自不書者也王氏葆曰主襄公之婚其罪大故書之詳主桓公之婚其罪小故書之略張氏洽曰王姬即齊侯之夫人王姬是也魯於齊為讎然已易世故齊侯之來逆不書止書王姬之歸而已王女下嫁無異於諸侯之女適人者蓋夫婦之道乃三綱之所繫不可不早正故因其始嫁而一之於諸侯女歸之辭焉若曰往之女家必敬必戒常禮不可紊也趙氏鵬飛曰魯主之也魯周之懿親也為王主婚固多矣惟莊公之世兩書王姬歸于齊所以見莊之無父也不然同姓主婚常事爾何以書之不書齊逆亦常事也案王姬歸齊春秋兩書之皆以魯主婚也左氏稱齊侯來逆共姬則魯之主婚明矣公穀以此年為過我恐無可據當從陸氏淳劉氏敞所駁為是

已莊王十
亥五年

十有二年

齊桓四年晉緡二十三年衛惠十
八年蔡哀十三年鄭厲十九年子

儀十二年曹莊二十年陳宣十一年杞靖二
十二年宋閔十年秦武十六年楚文八年

春王三月紀叔姬歸于鄫

穀梁

國而曰歸此邑也其曰歸何也吾
女也失國喜得其所故言歸焉爾

胡傳

莊公四年紀侯去國叔姬至此始歸于鄫者紀
侯方卒故叔姬至此然後歸爾歸者順詞以宗

廟在鄫歸奉其祀也魯為宗國婦人有來歸之義紀
既亡矣不歸於魯所謂全節守義不以亡故而虧婦
道者也魯人高其節義恩禮有加焉是故其歸于鄫
其卒其葬吏冊悉書夫子修經存而弗削使與衛之
共姜同垂不朽為後世勸若夏侯令女曹夷之弟婦
也寡居守志父母欲奪而嫁之誓而弗許而曰曹氏

全盛之時尚欲保終況今衰亡何忍棄之間者為之感動其間叔姬之風而興起者乎

集說

何氏休曰書歸鄆者痛其國滅無所歸也鄆不繫齊者時齊聽後五廟故國之范氏甯曰鄆

紀邑也紀季所用入于齊者紀國既滅故歸鄆江熙曰叔姬守節積有年矣紀季雖以鄆入于齊不敢懷貳然襄公豺狼未可闇信桓公既立德行方宣於天下是以叔姬歸於鄆魯喜其女得申其志杜氏預曰紀侯去國而死叔姬歸魯紀季自定於齊而後歸之全守節義以終婦道故繫之紀而以初嫁為文賢之也陸氏淳曰啖氏云稱紀言紀之婦也書歸善叔姬之全婦道也蓋紀侯大去其國之後死於他國而叔姬還魯至是乃歸于鄆美其能全婦道故特書之劉氏敞曰紀君奔國滅紀侯之沒尚不書叔姬何以得書春秋欲因叔姬之行以明紀季之義言季之以鄆入齊非利之也凡欲存國耳此其效也蘇

氏轍曰叔姬始以媵歸紀侯去國無歸而叔姬歸
魯及紀季自定於齊而後歸鄆善其得禮故書稱紀
叔姬明非嫁也陳氏傳良曰紀亡矣曷為謂之紀
叔姬存紀也國滅而復見者善辭也是故紀亡書紀
叔姬陳亡書陳災張氏洽曰叔姬伯姬之姊隱七
年歸于紀者伯姬既死叔姬實攝內事而能以國
之存亡貳其事君子之心不以身之榮悴變其奉宗
廟之志故必歸于鄆以終其身易曰眇能視利幽人
之貞於叔姬見之矣夫死無子而終於父母家者非正
乎家氏鉉翁曰夫死無子而終於父母家者非正
也終於夫家正也陳氏深曰公羊傳其國亡矣徒
歸於叔爾師氏探公羊說以為未詳而謂紀侯既卒
叔姬歸於父母之國可也嫂叔不通問況可歸於叔
乎以歸為婦人初嫁之辭今叔姬于鄆亦言之蓋譏
之也東海亦謂失婦人以禮自防之義其說固通然
春秋於叔姬當隱七年歸紀雖媵亦特書之以其賢

也至此已三十四年紀國已亡歸鄴奉祀以終其身
非其婦節可重聖筆何故書卒又書葬以為婦道之
勸以是觀之三子之說殆不然也汪氏克寬曰叔
姬雖伯姬之嫡然諸侯夫人既卒則次妃攝治內事
故叔姬雖媵妾當奉紀之祭祀又曰或謂叔姬歸於
叔非其所歸亂也夫叔姬歸于鄴鄴乃紀五廟之所
在叔姬之歸以奉祭祀而非歸於鄴鄴乃紀五廟之所
女惟紀叔姬宋伯姬錄本末甚詳非賢而得若是乎
李氏本曰叔姬從紀侯去國至此紀侯卒而始歸
鄴宗廟在焉義當歸也卓氏爾康曰叔姬歸鄴一
事足風千古故先書叔姬之歸以本之惟書叔姬故
於伯姬之歸卒亦詳不然魯女之嫁於諸侯多矣何
獨伯姬乎張氏溥曰莊三年紀季以鄴入齊左氏
云紀判矣讀者疑焉紀未亡而鄴先入恐季之不能
守也及紀侯去國而薨叔姬歸鄴矣然後益知紀季
之賢也惟紀季能存宗廟惟叔姬能歸宗廟其兄失

國而其弟存之夫人卒而娣攝之春秋錄焉

案紀侯失國而薨叔姬歸魯至是始歸于鄫杜氏預劉氏敵蘇氏輟皆同江氏熙亦曰叔姬來歸不書非歸寧亦非大歸也然叔姬之志在於歸鄫以奉祀不終居魯故胡傳有不歸於魯之說

夏四月

秋八月甲午宋萬弑其君捷及其大夫仇牧

捷公作接

左傳十二年秋宋萬弑閔公於蒙澤遇仇牧於門批而殺之遇大宰督於東宮之西又殺之立子游

羣公子奔蕭公子御說奔亳南宮牛猛獲帥師圍亳

蒙澤杜注宋地梁國有蒙縣今河南歸德府商丘縣北有蒙澤縣南二十五里有蒙縣古城蕭杜

注宋邑沛國蕭縣今縣屬江南徐州縣北十里有
蕭城亳杜注宋邑蒙縣西北有亳城今歸德府

商丘縣北有大蒙城皇甫
謚所謂蒙為北亳是也

公羊

及者何累也弑君多矣舍此無累者乎孔父荀
息皆累也舍孔父荀息無累者乎曰有有則此

何以書賢也何賢乎仇牧仇牧可謂不畏彊禦矣其
不畏彊禦奈何萬嘗與莊公戰獲乎莊公莊公歸散
舍諸宮中數月然後歸之歸反為大夫於宋與閔公
博婦人皆在側萬曰甚矣魯侯之淑魯侯之美也天
下諸侯宜為君者唯魯侯爾閔公矜此婦人妬其言
顧曰此虜也爾虜焉故魯侯之美惡乎至萬怒搏閔
公絕其脰仇牧聞君弑趨而至遇之於門手劍而叱
之萬臂掇仇牧碎其首齒著乎門闔仇牧可謂不畏
彊禦
矣

穀梁

及其大夫仇牧以尊及卑也仇牧閑也

胡傳

君弑而大夫死於其難春秋書之者其所取也大夫死於弑君之難而有不書者故知孔父牧

息皆所取也夫仇牧可謂不畏彊禦矣然徒殺其身不能執賊無益於事也亦足取乎食焉不避其難義也徒殺其身不能執賊亦足為求利焉而逃其難者之訓矣何名為無益哉夫審事物之重輕者權也權重輕而處之得其宜者義也大宰督亦死於閔公之難削而不書者身有罪也惠伯死於子惡之難亦削而不書者非君命也召忽死於子糾之難孔子比於匹夫匹婦之諒自經於溝瀆而莫之知者所事不正也若仇牧苟息立乎人之本朝執國之政而君見弑不以其私也雖欲勿死焉得而勿死聖人書而弗削以為求利焉而逃其難者之勸也惟此義不行然後有視棄其君如土梗弁髦曾莫之省而三綱絕矣

集說

范氏甯曰仇牧扞衛其君故見殺孔氏穎達曰萬不書氏者釋例曰宋萬賈氏以為未賜族

案傳稱南宮長萬則為已氏南宮不得為未賜族也推尋經文自莊公以上諸弑君者皆不書氏閔公以

下皆書氏劉氏敞曰何以書賢也何賢乎仇牧仇牧之智則未仇牧之忠則盡矣疾其疾而忘其力憂

其憂而忘其生也劉氏克莊曰仇牧荀息殺身而不能執賊春秋猶賢之家氏鉉翁曰春秋書弑君

而及其大夫者凡三人皆所以錄死節也宋萬南宮萬也以討故去其族李氏廉曰孔父仇牧荀息胡

氏皆以為名獨公穀啖子以孔父為書字疑公穀先君死之說亦通蓋考傳皆合也卓氏爾康曰太宰

督與仇牧同死官位崇於牧操國重於牧削而不得書身有罪也當時督之見殺告策必先於牧削而不

書夫子

特筆

冬十月宋萬出奔陳

左傳

冬十月蕭叔大心及戴武宣穆莊之族以曹師伐之殺南宮牛於師殺子游於宋立桓公猛獲

奔衛南宮萬奔陳以乘車輦其母一日而至宋人請猛獲於衛衛人欲勿與石祁子曰不可天下之惡一也惡於宋而保於我保之何補得一夫而失一國與惡而棄好非謀也衛人歸之亦請南宮萬於陳以賂陳人使婦人飲之酒而以犀革裹之之比及宋手足皆見宋人皆醢之

胡傳

案左氏宋萬弑閔公於蒙澤奔陳宋人請萬於陳以賂陳人使婦人飲之酒而以犀革裹之宋

人醢萬然則賊已討矣曷為不書陳人殺萬而葬閔公乎夫天下之惡一也陳人不以萬為賊而納之又受宋人之賂而使婦人飲之酒是與賊為黨非政刑也特書萬出奔陳而閔公不葬以著陳人與賊為黨

之罪而不能正天討其法嚴矣
故曰春秋成而亂臣賊子懼

集說

劉氏絢曰弑君叛國凡民罔不懲況均諸侯哉
書所奔之國則受之之罪亦自見也張氏洽

曰陳容其奔罪已大矣受賂而後歸之與所謂殺其
人汙其宮而渚焉之意何其異哉陳氏深曰不曰

宋人殺萬而書宋萬出奔陳歸惡於陳也陳納之又
受宋賂而後歸之黨惡之罪不可掩矣吳氏澂曰

陳人當如昔年之執州吁者以執萬今乃受其奔是
為逆賊之逋逃主也李氏廉曰經書外大夫出奔

三十五始於宋萬汪氏克寬曰陳人既受賂及貪
賄而後以狙詐戮之則非天討矣慶父弑閔公奔莒

莒人亦受賂而後歸之及境而縊事與此同蓋亦不
能正天討故閔公亦不書葬也里克甯喜皆已殺而

卓剽不書葬蓋晉衛討亂臣不以其罪而又不以君
禮葬卓剽也蔡般未討而蔡景書葬乃變例而責諸

侯之不能討賊也考經之上下文與經之前後事而其義見矣屬辭比事春秋教也此之謂也季氏本曰書宋萬出奔陳者幸宋之臣子猶知賢桓公而立之以逐萬也豈可遂謂宋無人哉卓氏爾康曰宋萬奔陳賂陳得萬而醢之受賂者固有罪非宋之罪也苟得賊行誅信大義以快人心可矣其得賊之法安足問焉

案宋萬既討不書宋人殺萬而止書宋萬奔陳者責陳人受賂且取賂也或併罪宋人緩討逸賊則未察當日情事而無以服宋臣子之心矣萬勇而多力又執大權弑君殺大臣立子游而遣師圍亳勢彊若此蕭叔與五公之子孫以曹師伐之構兵兩月然後殺子游而立桓公豈能禁萬之逸也乃用賂請萬於陳得而醢之宋可謂有臣子矣何得與陳並譏乎然以視衛石碯討州吁之義則終為有間故宋閔不書葬

與魯閔同汪氏
克寬之說得之

庚僖王
子元年

十有三年

齊桓五年晉緡二十四年衛惠十九年蔡哀十四年鄭厲二十年子儀十

三年曹莊二十一年陳宣十二年杞靖二十三年宋桓公御說元年秦武十七年楚文九年

春齊侯宋人陳人蔡人邾人會于北杏

齊侯穀作齊人
北杏杜注齊

地當在今山東兗
州府東阿縣境

左傳

十三年春會于北杏
以平宋亂遂人不至

穀梁

是齊侯宋公也其曰人何也始疑之何疑焉桓
非受命之伯也將以事授之者也曰可矣乎未

乎舉人衆
之辭也

胡傳

桓何以及四國之徵者會是宋公邾子也然則何以稱人春秋之世以諸侯而主天下會盟之

政自北杏始其後宋襄晉文楚莊秦穆交主夏盟跡此而為之者也桓非受命之伯諸侯自相推戴以為盟主是無君矣故四國稱人以誅始亂正王法也或曰桓公始平宋亂遂得諸侯故四國稱人言衆與之也

集說

范氏甯曰言諸侯將權時推齊侯使行伯事杜氏預曰宋有弑君之亂齊桓欲修伯業故會

于北杏以平之孫氏復曰周禮九命作伯得專征諸侯若五伯者皆非命伯召伯賜齊侯命尹氏策命晉侯春秋皆不錄之故孟子曰三王之罪人又曰北杏之會桓公獨書爵者孔子傷周道之絕也桓公既入乘天子衰季將伯諸侯乃合宋人陳人蔡人邾人於此首圖大舉夫欲責之深者必先待之重故北杏

之會獨書其爵以與之蘇氏轍曰齊桓始合諸侯以平宋亂自是遂得諸侯故四國皆稱人言衆與之也僖二十八年晉文公與齊宋秦敗楚于城濮三國皆稱師蓋春秋之書始得諸侯者好會則稱人兵會則稱師以示衆與之也至襄八年晉悼公會諸侯之大夫於邢丘改命朝聘之數儉而有禮則大夫亦皆稱人蓋亦衆與之耳楊氏時曰春秋之世以諸侯而主天下會盟之政由北杏之會始以大夫而主天下會盟之政由文七年扈之盟始以諸侯主天下之政諸侯之無王也諸侯無天子之命而自相推戴桓公為盟主聖人苟不貶於其始則後世迹此而亂故獨書齊侯而宋陳蔡邾之君皆稱人則無王命而推齊侯為伯之罪著矣厥後宋襄晉文楚莊交爭天下之盟主而王道絕者襄桓之故也高氏閔曰齊桓始謀合諸侯皆人之而獨舉齊爵抑揚之辭也陳氏傳良曰春秋非主兵皆序爵也於是序齊於宋之

上而獨爵齊將子齊以伯也晉文公之簡曰晉侯齊
師宋師秦師皆始伯之辭也自是無特相會者矣
張氏洽曰東遷以來王政不行亂賊得志強暴肆行
天下思得賢伯之興久矣齊桓一會而宋陳蔡邾並
來受命可見天下歸之幾如水之就下然桓公苟能
於宋萬初弑君之時舉兵討之則不勞告諭而天下
翕然宗齊矣呂氏大圭曰方伯圖之未興也列國
諸侯更相吞噬間有若鄭莊齊僖之流雖能雄長於
一時而終未能執伯主之柄天下紛紛莫之統一然
心猶知有周也及伯圖既興則翕然唯伯主之為聽
下以號令諸侯上以脅制天子一時氣勢聲威赫奕
中國賴以少事自是王命浸微矣是故有北杏之會
則有幽之盟有幽之盟而後有葵丘之盟則宰周公
會矣然猶未也至溫之會則天王實狩焉比事以觀
而善惡自見矣黃氏震曰北杏之會齊桓圖伯之
始也左氏以為平宋亂或者因之以起事歟家氏

鉅翁曰北杏之會惟齊侯書爵諸侯在會者皆書人書爵貴之也書人示衆望之所同屬也吳氏澂曰是時管仲為政四年矣教齊桓糾合諸侯以圖伯而始為此會也案上年宋有弑君之亂蕭叔大心僅能率五族殄亂賊立桓公御說平宋亂者定御說之位也以平宋亂會諸侯其名正矣然列國僅有陳蔡小國僅有邾莒宋四國而已若魯若衛最近於齊而皆不會齊桓之信未能孚於諸侯也李氏廉曰春秋始伯之書有三北杏獨書齊侯曹南獨書宋公城濮獨書晉侯是也然胡氏止於北杏發予齊侯之說陳氏兼及城濮至於曹南二家皆不予之蓋以鹿上復人宋則非始伯之辭矣然則曹南予宋亦可又曰此為齊桓伯事之始桓公自莒反齊得管仲於鮑叔而任之首懲襄公田獵畢弋之戒於是管仲得以盡行其術制國以為二十一鄉工商之鄉六士鄉十五公與國高各帥五鄉焉作內政而寄軍令興鹽筴以盡

海王之利春蒐秋獮有士三萬人以方行天下而又
以三選擇賢始於鄉長之推繼於官長之選復親自
賢相於是民皆勉於為善相地而哀征山澤各致其
時於是民各安其居正封疆重聘幣號召天下之遊
士以犀甲贖罪反棠潛於魯使為南伐之主反臺原
漆里於衛使為西伐之主反柴夫吠狗於燕使為北
伐之主故齊國之境南至鉤陰西至濟東北至於河
東至於紀鄆有革車八百乘即位數年東南多亂者
萊莒徐夷吳越一戰帥服三十一國是雖伯者之事
然規模次第亦有自矣左氏於桓公事多略故具於
此又曰內政之法十五鄉出三萬人五家為軌軌有
長十軌為里里有司四里為連連有長十連為鄉鄉
有良人五鄉一帥故萬人為一軍帥帥之比之周制
萬二千五百人為軍者誠簡便矣故曰桓文節制之
師汪氏克寬曰桓率諸侯以平宋亂宋公決不以
微者會邾小國尤不敢以微者會公侯邵氏實曰

周禮九命作伯天子嘗使召伯錫齊侯命矣而穀梁氏謂桓非受命之伯何居命而後伯禮也伯而後命非禮也湛氏若水曰此五伯之始也平宋亂可也而列國相與戴齊以為主是無王也所謂功之首罪之魁也

案齊侯穀梁作齊人據李氏廉始伯之辭例以曹南城濮則當作齊侯為是四國稱人何氏休謂為微者劉氏敞謂為大夫皆非也春秋之時諸侯列於會而位乃定左氏謂平宋亂則宋人為宋公無疑餘可知矣或以稱人為貶辭或以為衆辭以為貶者天子錫命之法也以為衆者諸侯推戴之情也二說相兼始為得之

夏六月齊人滅遂

遂杜注遂國在濟北蛇丘縣東北今兗州府寧陽縣西北三十里有遂鄉

與濟南府肥城縣接界
陳氏深曰遂國舜之後

左傳夏齊人滅
遂而戍之

穀梁也遂國

胡傳滅國之與見滅罪孰為重取國而書滅奪人土
地使不得有其民人毀人宗廟使不得奉其宗
祀非至不仁者莫之忍為見滅而書滅亡國之善辭
上下之同力其亦不幸焉爾語有之曰興滅國繼絕
世天下之民歸心焉今乃滅
人之國而絕其世罪莫重矣

集說何氏休曰齊桓不任文德而尚武力又功未足
以除惡孫氏復曰桓公貪土地之廣恃甲兵
之衆驅逐迫脅以強制諸侯懼其未盡從也約之以
會要之以盟臨之以威束之以力有弗徇者小則侵

之伐之甚則執之滅之其實假尊周之名以自封殖爾故此年滅遂十四年代宋十五年伐邾十六年代鄭十九年代我西鄙二十年伐戎二十六年伐徐二十八年伐衛三十年降鄆閔元年救邢二年遷陽皆稱人以切責之蘇氏轍曰討其不會于北杏也高氏閔曰齊桓示威小國以脅大國聖人深責之黃氏仲炎曰北杏之會魯遂皆不至也齊於魯有納糾之憾有敗師之怨比於遂之可疾輕重較然矣然齊桓能忍於魯而會盟之不能忍於遂而殄滅之何歟蓋遂小國也利其易虐則借以立威魯望國也知其難圖則結以為助凡其恩威異用大率聽於力放於利而已矣非能壹以禮義為節也故曰五伯者三王之罪人也家氏鉉翁曰遂人不曾北杏固為有罪然未至於可滅也伯者假公義以濟私欲滅譚矣又滅遂不過為拓土開疆之計春秋於三年之間聯書二滅以著齊桓之罪陳氏際泰曰齊桓方修北

杏之會而先滅譚繼滅遂其滅也有二曰讐諸侯曰
倍兵力故有滅國之事齊桓之所以為伯無柔遠能
邇之心也有滅國之事齊桓之所以能伯得近攻遠取之術也

案穀梁云不日微國也非也經書滅而不書日者
多矣亦有書時而不書月者矣蓋皆因史舊文也

秋七月

冬公會齊侯盟于柯

柯杜注濟北東阿齊之阿
邑今兗州府東阿縣地

左傳

冬盟于柯始
及齊平也

公羊

莊公將會乎桓曹子進曰君之意何如莊公曰
寡人之生則不若死矣曹子曰然則君請當其

君臣請當其臣莊公曰諾於是會乎桓莊公升壇壓
子手劍而從之管子進曰君何求乎曹子曰城壞壓

竟君不圖與管子曰然則君將何求曹子曰願請汶陽之田管子顧曰君許諾桓公曰諾曹子請盟桓公下與之盟已盟曹子標劍而去之要盟可犯而桓公不欺曹子可讎而桓公不怨桓公之信著乎天下自柯之盟始焉

穀梁

曹劌之盟也信齊侯也

胡傳

始及齊平也世讎而平可乎於傳有之敵惠敵怨不在後嗣魯於襄公有不共戴天之讎當其

身則釋怨不復而主王姬狩于禚會伐衛同圍郕納子糾故聖人詳加譏貶以著其忘親之罪今易世矣而桓公始合諸侯乃欲修怨怒鄰危其宗社可謂孝乎故長勺之役專以責魯而柯之盟公與齊侯皆書其爵則以為釋怨而平可也或稱齊襄公復九世之讎而春秋賢之信乎以仲尼所書柯之盟其詞無貶

則復九世之讎而春秋賢之者妄矣其諸傳者借襄公事以深罪魯莊當其身而釋怨耶

集說

范氏甯曰曹劌之盟經傳無文蓋有信者也孫氏復曰公不及北杏之會桓公既滅逐懼其

見討故盟於此孫氏覺曰魯與齊為世讎小白之入魯納子糾伐之至於屢戰則齊魯不和久矣於是齊桓求伯欲與魯平故為柯之盟也左氏曰始及齊平是也王氏葆曰柯齊地而言公會則此會本齊侯之志也朱子曰凡事貴謀始莊公親見襄公殺其父既不能復讎反與之燕會又為之主婚豈特不能復而已既親與讎人如此到桓公時又自隔一重了如何更責他去報見讎在面前不曾報得更欲報之於其子若孫非惟事有所不可也自做得沒氣勢又況齊桓公率諸侯尊周室以義而舉莊公雖欲不赴其盟會豈可得哉事又當權箇時勢義理輕重若桓公無事自來召諸侯莊公不赴可也今桓公名為

尊周室若莊公不赴非是叛齊乃叛周也張氏洽
曰魯莊自齊桓入國屢與之戰雖一再勝而齊方修
軍政以圖伯魯有見伐之虞至此始及齊平公穀所
載曹子之事齊桓捐小利以收魯容或有之皆伯術
也但公羊言之過其實耳趙氏鵬飛曰公羊載曹
子於盟齊歸汶陽之事經不書歸田況汶陽之田至
韋之戰而後能取無足據者然以為桓之信自是結
於諸侯則有之公伐齊納糾於桓為讎又敗齊師于
長勺郎之次齊又不得志魯之怨齊蓋未償也今頓
釋前憾而為是盟桓之心蓋休然有容矣宜諸侯之
心服也李氏廉曰曹子之說趙子不取胡氏亦未
及之然考之當時桓公修伯非得魯則不足為重故
捐小利以收之魯亦知齊欲以信求諸侯故因盟以
求地而公羊遂誇大之也蓋魯自長勺乘丘之勝國
勢稍振齊不敢以待譚遂之術待魯而多方以求之
屈已於歸田之請遷延於姻好之成示威於三國之

伐耀武於戎捷之獻而魯自是不敢有從違之心矣
九合之盛亦原於此公羊之說不可謂無汪氏克
寬曰公羊稱齊襄復九世之讎則失之過莊公當其
身釋怨不復則失之不及今考桓公至定公纔八世
而夫子相定公會齊侯于夾谷安得謂九世猶可復
讎乎春秋於祿之狩人齊侯以貶公於溺會伐衛貶
不書公子於圍郕諱不書公屢加貶絕則復讎之責
至矣故柯之盟不復致貶誠以齊桓倡霸尊王安夏
顧不可以區區不能報之寡弱召其危辱以獲戾於
先君也聖人輕重之權衡豈不深切著明也哉張
氏溥曰柯之盟史記公羊以為曹沫之劫也仁山金
氏則曰遂在濟北必魯之附庸也齊未得魯必有來
伐之師伐遂而卒滅之以威魯是以魯忍而與齊平
為柯之盟也齊桓修霸必先以義動諸侯欲重於諸
侯必先得魯北杏之會宋陳蔡邾皆至猶未有魯也
至公與盟而齊伯成矣反稷之會而為北杏忘長勺

之敗而為柯盟桓之
所以能為諸侯主也

案汶陽歸田不見於經先儒多疑之者然經以公會
為文則此會乃齊桓之志桓欲親魯以圖伯不惜小
會以結之是以屢戰之怨一旦而平也張氏洽李氏
廉俱不廢公羊之說今從之隱三年盟蔑莊八年盟
莒經不書曰穀梁曰其盟渝也此年盟柯公穀皆以
不日為信豈蔑與莒俱不可信而柯獨不渝乎盟柯
之後野再會而魯不從則亦未可為信也況扈與葵
丘桓盟亦有書曰者則又遷就其說或以為危之或
以為美之何前後之互異乎朱子謂以日月為褒貶
穿鑿無義理者此類是也夫日與不日皆因舊史假
使舊史所無則聖人安得而強加
之乎故凡以日月為例者皆不錄

辛
丑
二年
十有四年

齊桓六年晉緡二十五年衛惠二十
年蔡哀十五年鄭厲二十一年子儀

十四年曹莊二十二年陳宣十三年杞共
公元年宋桓二年秦武十八年楚文十年

春齊人陳人曹人伐宋

左傳

宋人背北杏之會十
四年春諸侯伐宋

胡傳

宋人背北杏之會諸侯伐宋其稱人者將卑師
少也齊自管仲得政滅譚之後二十年間未嘗

遣大夫為主將亦未嘗動大衆出侵伐蓋以制用兵
而賦於民薄矣故能南摧彊楚西抑秦晉天下莫能
與之爭也或以為

貶齊稱人誤矣

集說

杜氏預曰經書人傳言諸侯者總衆國之稱
程子曰春秋之法將尊師衆曰某帥師將卑師

衆曰某師將卑師少曰某人將尊師少曰某伐某齊
自管仲為政莊十一年而後未嘗興大衆也其賦於

諸侯亦寡矣終管仲之身四十年息養天下厚矣惟
救邢稱師譏其次也至於秦晉使之不競而已不强
致也是以其功卑而易成張氏洽曰伐宋而同陳
曹皆宋之鄰不動遠國亦簡便之規模也吳氏澂
曰北杏之會齊侯本以定宋君之位而宋即背之蓋
假仁義非誠心故人心不孚也李氏廉曰經列國
書人而伐者齊伯之編有三此年伐宋十五年伐鄭
十六年伐鄭皆連三國而稱人將卑師少之文也晉
伯之編有三文二年伐秦十七年伐宋宣十年伐鄭
皆連四國而稱人貶之文也餘若宣元年二國伐
鄭僖三十三年三國伐許宣二年四國侵鄭稱人皆
在貶例汪氏克寬曰十三年滅遂十五年伐鄭十
六年伐鄭十九年伐我二十年伐戎二十六年伐徐
二十八年伐衛救鄭三十年降鄭閔元年救邢二年
遷陽僖四年伐陳侵陳七年伐鄭十七年伐英氏皆
稱人惟次鼎北城邢伐厲書師救徐書大夫其餘侵

蔡伐楚伐鄭圍新城伐北戎皆書爵則君自行爾伐
山戎書人獨非將卑師少者以遇魯濟獻捷書齊侯
也故

案胡傳以稱人為將卑師少揆之經文所書亦不盡
合至謂二十年間未嘗遣大夫為主將則非也夫不
遣大夫為將則以何人為將耶此說之
不可通者矣然相沿已久姑存其說

夏單伯會伐宋

單音善

左傳

夏單伯會之取
成於宋而還

公羊

其言會伐宋
何後會也

穀梁

會事之
成也

胡傳

隱公四年諸侯伐鄭
蔡衛四國之名今諸侯伐宋而單伯會伐不復

再舉三國之名何也宋人背北杏之會合諸侯而伐之者齊桓公也會伐者無貶焉故其辭平主謀伐鄭而欲求寵於諸侯以定其位者州吁也會之者黨逆賊矣故其辭繁而不殺疾之也再舉而列書者甚疾四國之辭也言之不足故再言之而聖人之情見矣

集說

何氏休曰據伐國不殊會曹伯襄言會諸侯本期而後故但舉會書者刺其不信因以分別功

惡有深淺也從義兵而後者功薄從不義兵而後者惡淺范氏甯曰伐事已成單伯乃至孫氏復曰

此公使單伯會伐宋也桓以諸侯伐宋本不期會魯自畏齊故使單伯會伐宋三國稱人獨書單伯者吾大夫不可言魯人故也劉氏敞曰其言會伐宋何往會之也伐宋之時本不預謀後聞乃遣大夫往會

之爾 高氏閔曰非既約而後期與袁僑如會同
胡氏銓曰齊桓非天王命而專伐亦春秋之所惡也
孟子曰天子討而不伐五伯摟諸侯以伐諸侯三王
之罪人也 張氏洽曰魯自盟柯已平於齊而未從
其役故因齊討宋命上卿帥師往會示從伯之意齊
桓方興理勢當從固異於輦會宋殤黨亂賊伐無罪
矣故書會伐而不再叙諸國也 吳氏澂曰伐宋之
役齊止用近宋之陳曹而不煩遠兵然魯方從伯故
齊雖不徵於魯而魯自遣單伯以兵往會也 俞氏
臬曰單伯魯卿元年逆王姬者左氏以為周卿杜氏
附會以為畿內諸侯蓋周有單子非單伯也若周之
單伯則當書曰天王使單伯會伐宋今先書春齊人
陳人曹人伐宋則知齊主兵也夏單伯會伐宋則知
魯臣會伐也又如隱公四年四國伐鄭宋主兵而輦
會伐辭與此同由是論之單伯魯臣確矣 鄭氏王
曰案左氏於單伯逆王姬誤為送至是附成其說故

以為齊請師而單伯王臣會之也李氏廉曰內大夫會伐者八獨單會四國伐鄭與單伯會伐宋皆先列諸侯之伐然後稱會蓋後會之文也汪氏克寬曰左氏云齊請師於周單伯會之故治左氏者皆以單伯為周大夫今考成十六年十七年尹子單子三會伐鄭不書會伐又沉定四年傳云劉文公合諸侯伐楚而經仍書公會劉子諸侯侵楚今既稱單伯會伐則單伯為魯大夫明矣

附錄左傳

鄭厲公自櫟侵鄭及大陵獲傳瑕傳瑕曰苟舍我吾請納君與之盟而赦之六月甲

子傳瑕殺鄭子及其二子而納厲公初內蛇與外蛇鬪於鄭南門中內蛇死六年而厲公入公聞之問於申繻曰猶有妖乎對曰人之所忌其氣馭以取之妖由人興也人無釁焉妖不自作人棄常則妖興故有妖厲公入遂殺傳瑕使謂原繁曰傳瑕貳周有常刑既伏其罪矣納我而無貳心者吾皆許之上大夫之

事吾願與伯父圖之且寡人出伯父無裏言入又不
念寡人寡人憾焉對曰先君桓公命我先人典司宗
祏社稷有主而外其心其何貳如之苟主社稷國內
之民其誰不為臣臣無貳心天之制也子儀在位十
四年矣而謀召君者庸非貳乎莊公之子猶有八人
若皆以官爵行賂勸貳而可以濟事君其若之何臣
聞命矣乃縊而死

大陵杜注鄭地今河南開封
府臨潁縣北十里有大陵城

秋七月荆入蔡

左傳

蔡哀侯為莘故繩息媯以語楚子楚子如息以
食入享遂滅息以息媯歸生堵敖及成王焉未

言楚子問之對曰吾一婦人而事二夫縱弗能死其
又奚言楚子以蔡侯滅息遂伐蔡秋七月楚入蔡君

子曰商書所謂惡之易也如火之燎于原不可鄉邇其猶可撲滅者其如蔡哀侯乎

穀梁

荆者楚也其曰荆何州舉之也州不如國國不如名名不如字

集說

張氏洽曰息之亡蔡之入皆哀侯致之惟干戈省厥躬亦足見蔡自會鄧懼楚之後非但不為

徹桑土繆牖戶之謀而以一婦人之故再召楚師始則身虜繼以國破楚熊賢與兵以悅婦人當時齊桓之業未成遂致其橫行淮漢故特書蔡之見入兩著其罪也呂氏大圭曰入春秋以來蔡嘗從王伐鄭

則猶修勤王之職也會于鄧盟于折會于曹則猶交諸侯玉帛之好也伐鄭伐衛伐戴則猶同諸侯兵車之會也自敗莘以來五年兩被荆伐齊桓稱伯蔡僅一從北杏之會自是而後蔡皆不與蓋折而從楚矣是故召陵加師僅足以得楚人之屈服而不能草蔡人從楚之心城濮之役楚既大創蔡始改圖踐土之

載書曰晉重耳蔡甲午晉文既歿而中國之盟會蔡復不與晉悼之興列國悚焉聽命而蔡且安於楚之宇下終悼之世不能得蔡也晉悼歿而楚之役蔡常從之蔡昭以裘佩之微遭三年拘止之辱沈璧以絕楚質子以請晉而召陵之役晉人求貨而辭蔡柏舉之戰遂使蔡人假手於吳楚禍雖深蔡憂未艾哀元年楚復圍蔡蔡人謀徙州來迄春秋之後而蔡終為楚所并其從楚最先其事楚最堅而蒙楚之禍最甚趙氏鵬飛曰齊桓圖伯三年得魯而失宋諸侯蓋未協也而荆又入蔡齊桓蓋患之而未以制也其後凡二十六年諸侯協從中國無釁而後伐之亦足見楚之強不可俄而服也李氏廉曰蔡為周室宗盟之長近於楚而嘗受楚禍故自北杏之後齊之盟會蔡不復與矣蔡之始錄於經則會鄧以懼楚終錄於經則遷州來以避楚楚之始錄於經曰敗蔡終錄於經曰圍蔡齊晉之伯其極盛則侵蔡以伐楚其極

哀則會召陵以救蔡而不能終於柏舉之戰吳孫中國之權又以蔡故焉原一蔡之始終而中國消長之形荆楚強弱之端皆可見矣

案蔡以女子啟戎荆以彊暴虐小誠有罪也蔡從齊為北杏之會而荆人入之齊桓坐視不恤不亦病乎經書荆入蔡參譏之也然則齊桓不知蔡之當救邪非也是時桓之力尚未足以制楚故不欲自挫其銳而姑以蔡委之況宋人甫會而遽畔桓專力以謀宋則勢難相顧矣豈不知蔡之當救也哉

冬單伯會齊侯宋公衛侯鄭伯于鄆

鄆音絹 鄆地東郡甄城今

山東東昌府濮州東二十里舊城集故鄆城也

左傳

冬會于鄆宋服故也

穀梁

復同會也

集說

范氏甯曰諸侯欲推以為伯故復同會于此以謀之劉氏敞曰左氏見周有單子遂誤以單

伯亦為周大夫凡王人出會諸侯無不序公侯之上則是主會者宰周公劉子之類是也既序公侯之上則是主會之人矣何必赴以單伯會諸侯乃成主會乎左氏誤以單伯為大夫杜氏因為之飾說欲證單伯使必為周人而委曲求合非解經之體也高氏閔曰諸侯伐宋踰時不解至是宋公始服而為此會張氏治曰宋公親會魯卿而齊伯略定矣吳氏澂曰陳蔡曹邾已歸齊者不復與會蓋齊之伯政務簡便不欲煩諸侯也李氏康曰經書內大夫會外諸侯者六惟單伯于鄆季孫宿于邢丘會伯主及列國其餘若公孫叔會晉侯公孫歸父會楚子季孫行父公孫歸父之會齊侯皆特相會也大夫會諸侯伉尊出位左

氏例以為內大夫可會外公侯非也雖齊桓初伯得魯為重不以單伯為嫌魯人顧望未專從齊不以單伯為卑然他日開權臣之專未必不始於此李氏本曰先儒以此為衣裳之會一也其說本於論語九合諸侯之言故以九定會數又計桓公之會不止於九則又以衣裳之會九兵車之會四足之此由不知九當作糾之過也朱子辨之詳矣卓氏爾康曰衛朔入國不通諸侯者九年鄭突自遇垂不通諸侯者十一年今皆不敢不至求服故也

欽定春秋傳說彙纂卷八